

Dapli daners per la cultura professiunala

Il cussegl grond augmenta las contribuziuns culturalas per in mez milliun francs


■ (anr/ac) **La cultura grischuna da-stga selegrar da dapli daners. Cun 67 vers 42 vuschs ha il cussegl grond dà suatientscha ad ina proposta da la deputada Sandra Locher dad augmentar las contribuziuns culturalas per in mez milliun francs en la rama dal preventiv.** En vista a la visita da divers acturs da la scena culturala grischuna sin la tribuna da visitaders dal cussegl grond il mardi passà èsi stà cler. I vegn debattà en connex cun il preventiv davart la cultura. Sut il post, 4350 Uffizi da cultura, è crudada la proposta da la deputada *Sandra Locher* (sp Cuira) d'augmentar la promoziun culturala en il chantun Grischun per 500 000 francs. La deputada ha bain ditg da vulair surschar la repartiziun dals daners a la regenza, ha dentant tuttina menziunà trais occurrenzas ed instituziuns tenor sias imaginaziuns degnas da retschaiver dapli daners. Ina giada il Festival Origen, lu l'Orchester Filarmonic Grischun ed il Teater da la citad da Cuira. La proposta ha survegnì bler sustegn en il cussegl tras tuttas fracziuns. Uschia ha il deputà *Vitus Dermont* (pcd Foppa) accentuà la valur da la cultura e ses sustegn per la proposta. La collega da partida *Margrit Darms* (pcd Foppa) ha annunzià da medemamain sustegnair in augment da las contribuziuns culturalas. Ad ella ha la concentraziun sin trais occurrenzas dentant plaschì sulet in pau. Ella ha visà a bleras occurrenzas culturalas pli pitschnas medemamain da valur e degnas da sustegn. Pli concret è il deputà *Ernst Sax* (pcd Rueun) s'articulà e visà a l'occurrenza

Opera Viva che basegnia medemamain sustegn statal per exister. Er el ha annunzià da sustegnair la proposta per in augment da las contribuziuns finanzialas a favur da la cultura. Plirs votums han visà a la valur da la cultura en in chantun turistic. Ina cultura che promovia quel turissem e stgaffeschia plivalur en regiuns periferas. La promoziun culturala è vegnida cumparegliada cun la promoziun turistica e divers votums han mess il credit da 300 milliuns francs stà prevì per la candidatura olimpica visavi al mez

milliun supplementar annual per la promoziun culturala.

Pretendi ina cultura amicabile vers il turissem

Il deputa *Leo Jeker* (pbd Tschintg vitgs) ha fatg attent vers ils lavurers da la cultura ch'els stoppian esser cuncients da la derivanza dals daners per la cultura. Ed el è sceptic vers la plivalur recaltgada dal turissem cultural. Tuttina ha Leo Jeker annunzià da sustegnair l'augment da las contribuziuns a favur da la cultura. El ha dentant stipulà cleramain sias pretenziuns vers quella cultura. Numnadamain ina tenuta pli positiva vers l'economia ed il turissem. En quael regard ha el fatg a savair che l'intendant dal Festival Origen, *Giovani Netzer*, na saja betg s'exprimi cunter la candidatura olimpica dal chantun Grischun. Opposiziun vers l'augment da las contribuziuns culturalas è vegnida principalmain dal president da la cumissiun da gestiun *Cristiano Pedrini* (pbd Roverodo). El ha fatg attent a l'incumbensa instituziunala da preschentar in preventiv ulivà e visà a l'avegnir finanziel dal chantun pauc agreabel ed a la proposta da reverder la lescha da la promoziun culturala proximamain. Il cusseglier guvernativ, *Martin Jäger*, ha defendì la posiziun da la regenza e da la cumissiun da gestiun. El ha fatg attent a las contribuziuns enfin uss en la summa da 4,8 milliuns francs. 85 projects han retschavì l'onn current sustegn dal chantun da circa trais milliuns francs e 530 projects la summa totala da circa dus milliuns francs.



Dapli daners per Origen (foto) ed ulteriuras occurrenzas culturalas en il chantun Grischun ha concedì il cussegl grond.

FOTO P. DE JONG